

# INUIT ATAQATIGIIT

## Inatsisartuni



UPA 2017/46  
Nuuk, 18.05.2017  
Kelly Berthelsen

**Umiatsiaararsorlutik aalisartut saarullinnik bundgarninik pisarineqartunik pisarineqareerlutik aniseqqinneqartut annertussusaat pillugit nalunaaruteqartarnissaat, kiisalu nalunaarutigineqartut Pinngortitalerfimmuut atugassanngortinneqarnissaat qulakkeerniarlugu Naalakkersuisut suliniuteqarnissamik peqquneqarnissaat pillugu Inatsisartut aalajangiiffissaattut siunnersuut.**

(Inatsisartunut ilaasortaq Hans Aronsen, Inuit Ataqatigiit)

Inatsisartunut ilaasortap Hans Aronsenip Inuit Ataqatigiinneersup siunnersuutaa ima Inuit Ataqatigiinniit oqaaseqarfigissavarput.

Inuussutissanik niuerneq nunarsuarmi niuerutissat pitsaanersaraat, taamalu inuussutissarsiutissat patajaannersaralugu. Inuit nerisassanik pisariaqartitsiuassapput, pingaartumillu nunani siuarsimasuni aalanngippallaarneq peqqinnanngitsutorpallaarnerlu pissutigalugit inuit peqqiilliortalerneranni nerisassat peqqinnartut - tunisassiarisartakkatsitut ittut - piumaneqaraluttuinnarput.

Taamaammat aalisarneq ukiorpassuarni inuussutissarsiutigisussaagatsigu pisuussutitsinnik uumassusilinnik paarsilluarneq suli annerusumik pikkoriffigilertariaqarparput. Tassa pisuussutivut annerpaarpaamik iluaqutiginnaasariaqarpavut kisiannili nungusaalernissarput mianereqqissaartariaqarparput. Annerpaamik iluaquteqarnerup piniapilunnerullu killingat uniorumangikkutsigu paasissutissat pissarsiarisinnaasavut tamaasa pisariaqartippavut.

Ilisimasanik pissarsivissavut uumasorsiuujugaluarpata aalisartuugaluarpataluunniit paasissutissat pissarsiasavut amerlanerpaat, *pingaarnarpaamillu* aqqissugaasumik pisariaqartippavut.

Ajoraluartumik aalisartut piniartullu ilisimasaannik katersineq - aqqissugaasumik katersineq - suli iluatsivissorsimangilarput.

Nunatut uumassusilinnik annermik napaniuteqartutut uumasorsiuut aammalu atuisut - aalisartut piniartullu - ilisimasaannik ataatsikkut katersinissamik atuinissamillu ilikkartariaqaleqaagut.

Siunnersuut manna immaqa siunnersuutigineqarneratoqqissaq pinngikkaluarlugu kisianni siammarneqarsinnaavoq: Tassa atuisut ilisimasaannik aqqissugaasumik katersisarnermi periusissanik nassaarnialernissamut aallaaviusinnaavoq. Uumasorsiuut, aalisartut piniartullu kattuffiat, piniarnermik nakkutilliisut, allallu isumasiorneqarsinnaapput atuisut ilisimasaannik pitsaanerpaamik qanoq katersisoqartarnissaa nassaariniarlugu. Taamaammat siunnersuut taamatorpiaq isikkoqartillugu imaluunniit siammasinnerusunngorlugu ingerlateqqinneqassanersoq oqaluseritikkumallugu ataatsimiititaliamut ingerlatitassanngortinneqassasoq kaammattuutigissavarput.